

Estudiante di Colegio EPI a bay Hulanda pa haci pasantia na restaurant prestigioso



ORANJESTAD (AAN): Aruba Marriott Resort & Stellaris Casino, AHATA, ASD Hotel & Restaurant Equipment & Supplies y Colegio EPI, kier a desea graduado di Colegio EPI Ivan Puriel hopi exito cu su pasantia den exterior na un restaurant prestigioso di dos Michelin Stars di Chef François Geurds, na Rotterdam, Hulanda.

Diahuebs, 11 di januari graduado Ivan Puriel a subi avion pa haci un di su soñonan realidad. E mes a expresa cu oportunidadnan asina ki ta bini danki na dedicacion, door di kere den bo mes y tambe na companianan cu kier hiba Aruba pa dilanti.

EPI ta sumamente orguyoso di Ivan y ta wak cu e ta bay logra cos nan grandi den futuro. Mas cu claro ta gradici Aruba Marriott Resort & Stellaris Casino y su Complex General Manager, Raoul Lemmerling, pa a financia e acomodacion di Ivan.

Tambe kier a gradici AHATA y su Presidente, Tisa LaSorte pa financia e vuelo y otro gastonan. Y sin laga afo, nos ta gradici ASD Hotel & Restaurant Equipment & Supplies pa financia e uniform di e chef pa Ivan. Di parti di Colegio EPI ta contento di nan werkgroep International Affairs cu a aporta na yuda coordina e proyecto aki.

Esaki ta sigur un bon comienso pa e area culinario por sigui crece y tambe bira mas atractivo cu oportunidad pa tur den e sector aki. Aruba por keda pendiente di mas proyecto grandi asina ki cu ta na caminda.




#In Memoriam

UNOCA lo keda recorda Juby cu hopi cariño

-- Hubert C. "Juby" Naar --
1943- 2024

Di aña 2000 te 2014, Juby a forma parti di directiva di UNOCA. E fundacion cu Juby tabata representa tabata Centro Cultural Arubano (CCA). E dos puesto cu Juby a ocupa tabata di tesorero suplente y secretario suplente.

Tocante su miembrecia den directiva, por bisa cu Juby tabatin vision pa teatro. E tabata defende e arte escenico aki sin negligencia etica y maneho general di UNOCA.



Juby semper tabata bon na tempo y bon prepara. Tabata keda semper hopi trankilo y tabatin hopi pasenshi. Durante e 14 añanan den directiva, Juby nunca no a rabia, ni halza voz. Pues por bisa sigur un persona hopi respetuoso.

Ta asina cu despues di reunionnan dia cu Juby mester lift, directora tabata hibe cu smaak su cas cu yen combersacion den auto. Cu su sakito di snack haya di personal.

Pa e personal di UNOCA, Juby tabata manera un omo of ruman homber mayo. Semper ta check dia cu Juby mester bin reunion, pa trece y warda snack of cos dushi pa Juby.

Juby ta asina trankil, cu un biaha un persona a tripi di ofende Juby na UNOCA. Personal di UNOCA a rabia. Juby mes a keda trankil y a trankilisa nos.

Juby semper tabata cla pa comparti informacion historico y propio experiencianan di bida cu nos. Juby tabata un archivo di historia cultural. Juby hopi danki pa tur locual Juby a siña nos

Sosega na paz.